

摘藻堂四庫全書薈要

經部

欽定四庫全書薈要卷一千九百二十四

經部

周禮訂義卷二十八 宋 王與之 撰

角人下士二人府一人徒八人

賈氏曰角人至掌蜃亦是徵斂之官故在此○鄭鍔曰齒者象之牙骨則麋鹿骨之類獨以角名官何耶以弓人為弓攷之角也者以為疾也穉牛之角直而澤老牛之角紕而昔長二尺有五寸三色不失理謂之牛戴牛一弓之用角如此其多則比之齒骨宜不

同也

掌以時徵齒角凡骨物于山澤之農以當邦賦之政令

鄭康成曰山澤出齒角骨物大者犀象小者麋鹿○

陳氏曰齒角骨物王府繕人等皆用之

○李嘉會曰齒角筋骨可

供兵器留於民無用強取之恐匿而不出以之當邦賦則君不徒取民亦樂輸

陳及之曰自此下凡所謂山農澤農蓋平時以射田獵取締綌及染草為業者非此則不徵○呂氏曰角人征齒角於山澤之農羽人征羽翮於山澤之農皆

以當邦賦之政令蓋各隨其所產以當其賦視後世
以錢為賦責民之所無者異矣○曹氏曰有山之農
有澤之農有平地之農田平地之田使供十一之稅
是謂平地之農山澤之利亦各據其土地所產所入
而賦之是謂山澤之農其曰以當邦賦蓋以山澤所
宜有者略倣十一之制以輸於公上亦如平地之農

輸穀粟十一之租於公上也

○李景齊曰周自田賦之外至於羽毛齒角一

草一木之微莫不有征凡以邦國之不可闕家宰所謂山澤之賦是矣然觀角人羽人與夫掌葛之所征

者皆曰取之山澤之農以當邦賦之征令則是
出所征之物即可以當邦賦而不復出田稅

以度量受之以共財用

鄭鍔曰官之受之欲其尺寸之中度其他齒角之類
不可以尺寸度者必量其多寡故以度量受之

羽人下士二人府一人徒八人

鄭鍔曰車服旌旗則用以為旆矢則用以為括物之
資羽多矣

掌以時徵羽翮之政于山澤之農以當邦賦之政令

鄭康成曰翮羽本也○賈氏曰此羽人所徵羽者當入於鍾氏染以為后之車飾及旌旗之屬

凡受羽十羽為審百羽為搏十搏為縛

古本反

鄭康成曰審搏縛羽數束名也爾雅曰一羽謂之箴十羽謂之縛百羽謂之緡其名音相近也一羽則有名蓋失之矣○鄭鍔曰審言察其數之詳搏言束百枚而可執縛言其數多則卷而束之舉物之數未嘗無名獨羽之名見於此亦猶詩載五紕五緇五總以

記絲之數也。○易氏曰：以度受之，則知其物之長短；以量受之，則知其物之多寡；以權受之，則知其物之輕重；其或不可受之，以權以度以量者，則為審為搏，為縛，無非參酌其數以當邦賦之政，則所用有補於國所賦不加於民，緩急可以相資，有無可以相通，賦用兩得於是為至。

掌葛下士二人，府一人，史一人，胥二人，徒二十人，掌以時徵絺綌之材于山農，凡葛征徵草貢之材于澤。

農以當邦賦之政令

王昭禹曰詩言葛之覃兮繼之是刈是穫為絺為綌則絺綌皆葛也言其物則曰葛言其服治之功則曰絺綌精者為絺麤者為綌

鄭康成曰草貢出澤潁紵之屬可緝績者

○鄭鍔曰草貢即閭

師所謂貢其物○李嘉會曰物雖微細不敢強取於民必曰當邦賦俾知賦不可免自然竭力為之彼有餘力上無乏佚此法之善也

以權度受之

鄭康成曰以知輕重長短也○賈氏曰角人齒角不須稱直言度量此經葛草不須量故以權度受之使知斤兩長短

掌染草下士二人府一人史二人徒八人

鄭康成曰染草藍蒨象斗之屬

○賈氏曰藍以染青蒨以染赤象斗染黑

掌以春秋斂染草之物

項氏曰春秋草生成之時故斂染草待時而頒之則

夏纁玄秋染夏之時

○李嘉會曰染草不斂於染人而斂於掌染草者慮染人緣色

目而求多於山澤之農故
或斂或用不專於一官

王氏曰掌染草至掌蜃所徵亦必當邦賦之政令而
不言者則以角人羽人掌葛見之

以權量受之以待時而頒之

鄭康成曰權量以知輕重多少時染夏之時

○賈氏曰案天

官染人云春暴練夏纁玄秋染夏夏為五色至秋染五色故鄭云染夏之時時謂秋時也

○王昭

禹曰染人春暴練夏纁玄秋染夏則纁玄之物頒以
夏染夏之物頒以秋

掌炭下士二人史二人徒二十人

掌灰物炭物之徵令以時入之

鄭康成曰皆山澤之農所出也

○鄭鍔曰灰者幄氏練帛之所用炭者官

人爐炭之所共皆邦用之所須其掌之有官宜矣

王昭禹曰掌葛掌染草莫不有徵斂之時掌灰炭之政令但曰以時入之何也蓋角羽草葛其生成有時非時則其物未成而不中用故徵斂皆有其時若夫炭灰則無時而不有故亦無時而不徵特以時入之

而已

以權量受之以共邦之用凡炭灰之事

掌荼下士二人府一人史一人徒二十人

鄭康成曰荼茅莠也

掌以時聚荼以共喪事

鄭康成曰共喪事者以著物也既夕禮曰茵著用荼

○賈氏曰案既夕禮為茵之法用緇翦布謂淺黑色之布各一幅合縫著以荼柩未入壙之時先陳於棺下縮二於下橫三於上乃下棺於茵上是也○鄭鍔曰荼以禦濕非常用

之物設官以聚之豈豫凶事哉孝子所盡心雖過求何害

徵野䟽材之物以待邦事凡畜聚之物

鄭康成曰茶茅蒨䟽材之類因使掌焉徵者徵於山

澤入於委人

○賈氏曰以委人掌斂野之賦斂䟽材等故也

掌蜃下士二人府一人史一人徒八人

鄭康成曰蜃大蛤月令孟冬雉入大水為蜃

掌斂五物蜃物以共闡墻之蜃

劉氏曰互物龜鼈屬

○項氏曰有甲互掩者

蜃物蠃蛤屬

○鄭

康成曰闔猶塞也將井槨先塞下以蜃禦濕也

○賈氏曰

士喪禮並宅還井槨於殯門之外注云既哭之則往施之窆中是未葬前井槨材乃往施之壙中未施槨前已施蜃灰於槨下以擬禦濕也

○王氏曰用蜃以禦濕除狸蟲

鄭司農曰春秋傳始用蜃炭言僭天子也

祭祀共蜃器之蜃

鄭司農曰蜃可以白器令色白

○賈氏曰案左氏云石尚來歸蜃公羊以

為宜社之內以蜃器而盛肉故名肉為蜃是祭社之器為蜃大行人云歸脤以交諸侯之福則宗廟社稷

之器物謂之為脤是其宗廟社稷之器皆蜃灰飾之

愚案祭有酒器有肉器亦皆有以蜃為飾者豈人云凡山川四方用蜃是酒器也大宗伯云以脤膾之禮親兄弟之國是肉器也

共白盛之蜃

鄭康成曰盛猶成也謂飾牆使白之蜃今東萊用蛤

謂之義灰云

○賈氏曰爾雅地謂之黝牆謂之聖黝黑也聖白也然則此經所云白盛主於

宗廟聖牆也

易氏曰四者微物而用不可缺故設官以掌

總論

陳及之曰凡此皆民業以自利者也先王之時凡民於田稅之外至有趨末作者一切徵其物大意欲抑末重本熙寧間京師市井凡販賣小民雖拾髮鬻薪提茶等類悉出免行錢不出者毋得販鬻市道其意亦曰抑末作游手之民然不知先王之世民無不受田者雖商賈家亦受田特減於農民抑其末作使反

其本則退有可耕之田不至失業饑寒自井田既壞
小民亡立錐之地勢不免販賣以自資今而曰抑之
歸農則退豈有可耕之地哉故重稅適所以啓其怨
咨之心饑寒之患而曰使之務本惡在其為政也介
甫常曰周禮一書理財者幾半周公豈好利者哉觀
此言若非為利然安在其不為利也

圉人中士四人下士八人府二人胥八人徒八十人

鄭康成曰圉今之苑○薛平仲曰遂自虞衡之官極

而掌蜃之微莫不有職君子所以治野人者悉矣而天子之囿游始見諸此謂之囿游信非棄田以為園囿使民不得衣食者比也

掌囿游之獸禁

項氏曰囿游苑囿游牧之獸或曰燕游處也禁者其蕃衛之禁

劉迎曰獸人冬獻狼夏獻麋春秋獻獸物皆所以備祭祀賓客之須囿人之牧百獸以為死獸生獸之共

耳其曰囿游之獸禁則囿游如芻蕘雉兔之往是也
謂之禁則不得侵取之非謂為囿游以為行樂焉或
者文王之囿方七十里焉夫靈臺靈沼之樂其有麋
鹿魚鼈則先王豈無囿游哉先儒以侈心待先王謂
以囿游備行樂卒以開人君盤游之樂而離宮別館
未必不自此啓也

牧百獸

鄭康成曰備養衆物也今掖庭有鳥獸自熊虎孔雀

至於狐狸鳬鶴備焉

○李嘉會曰獸既供於獸人又供於圉人蓋獸人所得或生而

致之則養之於圉人故曰牧

祭祀喪紀賓客共其生獸死獸之物

王氏曰獸人共生獸死獸圉人共生獸死獸之物者獸人所共田獵所罾圉人所共圉游所牧共其物若麋膚熊蹯之類○劉執中曰物者所共有名件也

場人每場下士二人府一人史一人徒二十人

鄭康成曰場築地為墠季秋除圃中為之詩云九月

築場圃十月納禾稼

薛平仲曰圃人以掌天子之園圃示民以其所同樂也然可樂之事易流則當務之急者易緩此場人之官又以列于此也夫以場人掌國之場圃而場人之官且曰每場下士二人府史各一人徒二十人則場圃之在國中者意亦多由是觀之先王始終於農事者固於此乎見場圃隨在而有者抑於此乎見地利蓋無遺於國中矣

掌國之場圃而樹之果蓏珍異之物以時斂而藏之

王昭禹曰載師以場圃任園地所謂國之場圃則屬

於公者場人之所掌也所謂民之場圃則屬於私者

閭師之所任也

○賈氏曰此據祭祀喪紀賓客者徵斂藏之其餘則閭師徵斂之也

○

鄭康成曰果棗李之屬蓏瓜匏之屬

○項氏曰有核曰果無核曰蓏

一云在木曰果在地曰蓏

珍異蒲桃枇杷之屬○王昭禹曰先王

之時徑行必有桑疆場必有瓜所以盡地力而無遺利方物之生則闢場為圃所以種植及物之成則築

圃為場所以收穫

凡祭祀賓客共其果蔬享亦如之

鄭康成曰享納牲也○賈氏曰此謂祭祀宗廟二灌後君迎牲納之於庭時后夫人薦朝事之豆籩中有果蔬之物故云享亦如之

易氏曰珍異果蔬物之至微而場人專掌之者以祭祀賓客之奉皆於此乎出也

廩人下大夫二人上士四人中士八人下士十有六人

府八人史十有六人胥三十人徒三百人

薛平仲曰場人既已為登穀之備矣則倉廩之官當有以為儲蓄之備也先儒以廩為藏米以倉為藏穀

○李嘉會曰廩造於平地之上倉造於屋之下故廩人之官必以下大夫二

人居之

○賈氏曰此官使下大夫為首徒三百人以米廩事重出納又多故也

自穀而

春榆以為米則米之為用所當貴重愛惜者而官其可輕畀哉是以廩人為之長而倉人以中士為之屬焉然廩人之後必繼之以舍人倉人之後必繼之以

司祿不為無意盖舍人之職其主宮中官府之次舍者也而宮中官府之稍食又非穀祿比於此焉不汲汲以均之則所以為養廉怙耻之本者得無有虧於自公退食之際而請謁行於私昵之間其弊有不可勝慮矣是則舍人所以次之也若夫穀祿之制自公卿大夫以至庶人之代其耕者多寡高下固有定數矣彼其以田賦祿而征其租上以共王賦下以享宗廟給私奉業子孫又非一時稍食者之比於此焉不

知所以裁之則無功受祿者特未免有伐檀之刺而
世祿之家鮮克由禮者亦豈無自而致哉是則司祿
所以次之也是盖先王務農重穀之教故敘次其設
官如此

掌九穀之數以待國之匪頒調賜稍食

鄭鍔曰廩人掌穀謂米出於穀故耳○易氏曰天府
職曰若祭天之司民司祿而獻民數穀數則知九穀
之數專掌於司祿今復見於廩人何也賈氏謂廩人

掌米倉人掌穀其義誠然蓋倉人掌粟入之藏辨九

穀之物則掌穀可知廩如御廩常廩之類則皆米也

不然明堂位何以曰米廩有虞氏之庠釋者以魯謂

之米廩虞帝上庠今藏粢盛之委焉非米而何以廩

名官所掌者米而云掌九穀之數者兼掌九穀之數

也○李嘉會曰數則一歲所入之目以數而入以數而出正廩人所掌故不曰物而曰數是知

倉人掌穀司祿掌九穀之數廩人即其九穀之數以

知廩米之數凡以待國之匪頒調賜稍食而已

鄭康成曰匪讀為分分頒謂委人之職諸委積也○

李

嘉會曰分頒者使自隨其數而入
之不獨委人也委人特一而已
賙賜謂王所賜予

給好用之式

○鄭鍔曰君於臣下
廩人繼粟者是也

稍食祿廩

○賈氏曰此即

司士以功詔祿又王制云下士視
上農夫九人祿中士倍下士之類

以歲之上下數邦用以知足否以詔穀用以治年之凶

豐

項氏曰歲言其成歲年言其收成若歲終定時成歲
皆以成歲言若有年大有年皆以收成言制國用者

必於歲之終穀粟之既入故曰以歲之上下數邦用
斂穀粟必於秋之成穀粟之始熟故曰以年之上下
出斂法禮曰制國用必於歲之杪是也

易氏曰年之有凶豐歲之所以有上下○鄭康成曰
數猶計也

項氏曰以歲之升降得穀之多少計國之所用多則
足少則否乃詔在上用穀之隆殺以治年之凶豐故
年適豐雖粒米狼戾不侈於有餘年適凶雖饑饉薦

臻不苦於不足則以有治之之術也易於萃言用大牲於升言利用禴是也○易氏曰制其財之多寡權

其禮之增損非廩人之事特以邦用之足否詔之於上凡以治年之凶豐而已年之凶豐天也所以治之者人也治之則權其多寡增損而為之開闢斂散其於豐也不為妄費以蠹其國其於凶也不為過取以

害民

○李嘉會曰歲自立春至次年立春天時也年自正月朔旦至歲除王政也天時雖不同王政

不可闕合三者治之斯可

凡萬民之食食者人四鬴上也人三鬴中也人二鬴下也

賈氏曰萬民食食者謂民食國家糧食者上謂大豐年中謂常年下謂少儉年此雖列三等以中年是其常法○鄭康成曰此皆謂一月食米也六斗四升曰

鬴

○楊謹仲曰周之量非後世比稟氏為量方尺深尺其實一鬴乃六斗四升今人所用之斛深亦一

尺而方幾二尺止容五斗如以古之量少今之量幾五倍於古矣然以中歲均人月食三鬴則是旬食一鬴日食六升四合矣量至漢猶然趙充國以為辛武賢欲引萬騎出張掖以一馬自負三十日為米二斛

四斗麥八斗則計人日食米八升王莽欲立威乃議
云十萬衆齋三百日糧十道並出嚴尤曰計一人三
百日用糧十八斛則是人食六升以此考之周之中
歲人日食六升四合上歲人日食八升五合不為過
矣

王氏曰民之食可以脯計者校登夫家貴賤老幼癯

疾之數觀稼省斂稽比財物其法詳也

○王昭禹曰先王之民生

齒以上有食之端已書于版校登稽比之法又詳則
凡民之幼壯孤寡登耗無不知也以口授田以田制
食觀稼省斂又以時出焉則凡
其食之有餘不足無不知矣

若食不能人二鬴則令邦移民就穀詔王殺邦用

易氏曰冢宰制國用其穀之所積皆有定所凡荒政所不能聚者均其遠近之所就穀而已○鄭康成曰殺猶減也○王氏詳說曰大司徒云大荒大札則令邦國移民通財為外諸侯設也廩人云若食不能人二鬴則令邦移民就穀為內諸侯設也蓋鄉遂公邑但移用其民而已卻非移民通財與移民就穀也鄉遂公邑同為天子之民若夫都鄙則各從其主矣鄭氏釋此以為就穀都鄙之有者誠得其說○鄭鏐曰

梁惠王移民就粟孟子譏之何耶蓋周官之民有田以耕其饑偶出於天時之水旱而已惠王不能制民之產凶歲則移民是為無政○劉氏曰古者三年耕必有一年之蓄九年耕必有三年之蓄以三十年之通計雖有旱乾水溢民無菜色猶設廩人就穀之法則患未至而預為之防

○李嘉會曰儲蓄所以立國非有大凶旱烏可輕動

凡邦有會同師役之事則治其糧與其食

王昭禹曰治者量遠近為之節○鄭康成曰行道曰

糧謂糒也止居曰食謂米也○鄭鍔曰會同師役有遠近之異則曰糧曰食亦宜不同遠則治其糧莊子言適百里者宿春糧適千里者三月聚糧蓋言遠也近則治其食詩云朝食于株左氏云食時而至蓋言近也

易氏曰糧乃會同師役之所急者太宰以九式均節財用而不及會同師役之式小宰之七事有所謂會同軍旅田役之戒具共其財用然會同所用者不過

牢禮委積膳獻飲食之飧牽則有賓客之式矣軍旅
田役所用者不過工事幣帛芻秣匪頒之數者則有
工事之式幣帛之式芻秣之式匪頒之式矣惟最急
之糧食乃無式焉蓋式法出於九賦之中乃國家之
經費冢宰制國用則以邦國之貢待帛用萬民之貢
充府庫二者之外隨處而積以待邦之大用則會同
師役之類凡九式所不載者皆取具於此不然倉人
共道路之穀積飲食之具遺人凡賓客會同師役掌

其道路之委積若非前二者之積將何所從出然特道路之所費而已若廩人之治其糧與其食又兼在道之費及止居之費也

大祭祀則共其接盛

鄭康成曰接讀為壹扱再祭之扱扱以授舂人舂之

○易氏曰接猶承也天子親耕籍田以共粢盛非有司親承之與常穀同何以致敬於鬼神故甸師以時入之於廩人廩人接之以藏於神倉及大祭祀之時廩人則共其所接之盛是以舂人接之則舂穀而為米饌人接之則炊米而為食然後王者得以親承祭祀其為敬至矣○王昭禹曰謂之接盛則其所以接

神者在
是歟

鄭康成曰大祭祀之穀籍田之收藏於神倉者也不
以給小用

總論

陳及之曰廩人至倉人凡九穀出入盡掌之而不會
計何也以司會考之以九賦之法令田野之財用以
九功之法令民職之財用掌國之官府郊野縣都之
百物財用凡在書契版圖者之貳以逆羣吏之治而

聽其會計則是官府與府藏財賦無不係焉而廩人以出入之大計聽之司會矣

舍人上士二人中士四人府二人史四人胥四人徒四十人

鄭康成曰舍猶宮也主平宮中用穀者○賈氏曰舍人主米穀故與廩人倉人連類在此

掌平宮中之政

鄭康成曰政謂用穀之政○賈氏曰舍人總主給米

之事而掌平王宮中之政謂平其給米多少

○李嘉會曰宮

中之政非獨六宮凡官府次舍皆在焉祿廩既衆非舍人掌之不可

易氏曰有王宮有后宮王宮之宮宮正為之均其稍食后宮之宮內宰為之均其稍食所以平宮中之政

則舍人也

○王昭禹曰舍人掌宮中之政以贊宮正內宰之事者也故宮正掌王宮之政令糾

禁內宰治王內之政令而舍人則掌平宮中之政

黃氏曰舍人猶詩言室人於內者也耕者勞於外食者逸於內先王存靡耗之戒焉故以其職曰掌平宮

中之政以至掌其出入既無事而食而其政不平出入不以法不其甚歟

分其財守以濫掌其出入

賈氏曰財即米也喪大記云納財朝一溢米○黃氏

曰守謂積聚米給予也

○易氏曰守禁之所謂之財守

○鄭康成曰

分其財守者計其用穀之數分送宮正內宰使守而頒之也而行出於廩人其有空闕則計之還入

○賈氏曰

必送米與宮正內宰者以二宮皆有宿衛之人須米料之數也○愚案此可見成周時凡官長各受其財

而分之
所屬

易氏曰出之於廩人入之於宮中皆有法存焉廩人不妄供宮中不妄取所謂平其政者莫先於此

凡祭祀共簋簋實之陳之

鄭康成曰方曰簋負曰簋○賈氏曰孝經云陳其簋簋注謂內負外方受斗二升者直據簋而言若簋則內方外負族人云為簋實一鬴豆實三而成鬴豆四升三豆則斗二升可知但外神用瓦簋宗廟當用木

○鄭鏐曰用簋以盛稻粱用簋以盛黍稷○王昭禹

曰實之以言其物陳之以言其數

○王氏曰既共簋簋之器又以饌人

所共之實實之陳之也

賓客亦如之共其禮車米芻米芻禾

鄭康成曰禮致饗餼之禮○賈氏曰聘禮曰致饗餼使卿韋弁歸饗餼米百筥設于中庭車米三十車陳于門外禾三十車芻薪倍禾又掌客上公米百有二十筥車米四十車禾五十車芻薪倍禾侯伯米百筥

車米三十車禾四十車芻薪倍禾子男米八十筥車
米二十車禾三十車芻薪倍禾皆言陳是其所陳多
少之數

○鄭鍔曰車米以車載之筥米以筥盛之也

○林氏曰掌客掌其

禮而舍人共其物

喪紀共飯米熬穀

鄭康成曰飯所以實口不忍虛也君用梁大夫用稷

士用粢

○賈氏曰喪大記文

皆四升實者惟盈

○賈氏曰士喪禮文

熬穀

者錯于棺旁所以感蚍蜉

○賈氏曰蚍蜉欲向棺植此感之○王昭禹曰使異

物不得親其膚而已

喪大記曰熬君四種八筐大夫三種六筐

士二種四筐加魚腊焉

以歲時縣種種之種以共王后之春獻種

鄭康成曰縣之者欲其風氣燥達○鄭司農曰春王耕于藉則后獻其種也后獻種見內宰職○賈氏曰內宰上春后獻種且助王耕事此歲時縣者從納禾治得子即縣之以至春獻之

掌米粟之出入辨其物

鄭康成曰九穀六米別為書

○賈氏曰九穀之名已見大宰注六米者九穀

之中黍稷稻粱苽大豆六者有米麻與小豆小麥三者無米

歲終則會計其政

鄭康成曰政用穀之多少○王昭禹曰宮正月終會稍食歲終會行事內宰歲終會內人稍食舍人掌米粟之出入而辨其物歲終則會計其政亦所以通職聯事也

倉人中士四人下士八人府二人史四人胥四人徒四

十人

項氏曰倉人掌藏粟者

掌粟入之藏

鄭康成曰九穀盡藏焉以粟為主○賈氏曰月令首種不入鄭注引舊記首種謂稷也即種粟是五穀之

長下文九穀此云粟是以粟為主

○李嘉會曰一歲所收粟則先熟兼

中國之地率多種粟蓋粟耐乾雖歲之旱不至太失此九穀之物必以粟而總其名

辨九穀之物以待邦用

項氏曰穀各有所宜用故辨其物以待用○鄭鍔曰
邦之用穀也有匪頒調賜稍食之殊則其精粗亦異
故宜辨其色焉

若穀不足則止餘灋用有餘則藏之以待凶而頒之

鄭康成曰止猶殺

王氏曰法式所用有雖不足不可以已者有待有餘
然後用者所謂餘法用則待有餘而餘用者○愚案

黃氏說

見遺人以待
施惠之後

○易氏曰大府所謂式貢之餘財以供

玩好幣餘之賦以待賜予委人所謂凡其餘聚以待
頒賜止餘法用止此者歟有餘則藏之以待凶而頒
之是樂歲則取之於民凶年則遂以頒之於民取之
不以為虐頒之乃所以為利無非充裕民之仁政
凡國之大事共道路之穀積食飲之具

王昭禹曰大事則戎祀之類蓋戎以出征而祀亦有
在郊者故倉人共道路穀積食飲之具若戎祀之外
則非所共也○黃氏曰大事大師役也其小者遺人

委積自足共之其大者倉人共其穀積食飲之具食
糗糒飲漿醢也

司祿中士四人下士八人府二人史四人徒四十人

劉迎曰司祿者司穀祿先儒誤為爵祿矣不然何以
與倉人司稼同列耶○易氏曰司祿逸篇弗可攷矣
此經猶存其官之名者以序見之不特見之序官而
已天府曰若祭天之司民司祿而獻民數穀數則受
而藏之鄭氏謂司祿為文昌第六星祿之言穀也則

以掌天下之穀數者謂之司祿亦猶掌天下之民數而秋官有司民之職蓋民之損益關乎天穀之豐耗係乎民此司民及三年大比則以萬民之數詔司寇司寇及孟冬祀司民之日獻其數于王王拜受之且有天府之登知司祿之於穀數亦然則王者以民為天民以食為天其類同其義可推矣

司稼下士八人史四人徒四十人

鄭康成曰種曰稼如嫁女有所生○薛平仲曰以廩

人倉人之藏而制為舍人司祿之用其數固有權度
矣然不知稼事之為勤怠徒取諸彼以予此則民得
不以為厲已哉舍農事而趨末作棄生養而就游惰
是又先王之所甚懼於是司稼之官復有以繼於後
誠以夫取稼事之已成者人知祿食之所當得勤之
於稼事之方興者不知民力之為甚至司稼則因天
之時察地之利軫念民勞而督趨之上之厚於民者
如此則民之奉於上者當如何耶

掌巡邦野之稼

王昭禹曰種曰稼穫曰穡先王既有以教之又觀之
巡之則有時治之則有法而此又有巡稼之官者蓋
稼事而滅裂則穡事亦以滅裂故致詳於稼事以作
其始則穡事之所以成終可知矣

而辨種陸之種周知其名與其所宜地以為灋而縣于
邑閭

鄭康成曰周猶徧也徧知種所宜之地縣以示民後

年種穀用為法也

易氏曰所謂法者周自后稷播種百穀以為鄉師天
以其粒食生民國其子孫千有餘年而後王業始大
南宮适以躬稼有天下而歸之於稷原其始也公劉
太王王季文王武王周公六君子可謂不替其業者
周公作六典舉前日播種之法而備見於大司徒即
以其法而責於司稼之官司稼復以其法而縣於邑
閭使稼者取法焉播種之法明為稼之效著當時所

以善其始者有道矣

巡野觀稼以年之上下出斂法

陳君舉曰鄭氏謂周制畿內用貢法邦國用助法司稼之職為貢法設豈知司稼不是這法是預前觀其稼而後上下其出斂之法若不預前觀稼如何上下其法得劉晏正傳此法每四方水旱則先知之然後為賙救收斂之政

愚案周行井田借民力以耕非復有所謂斂則司

稼所謂以年之上下出斂法者蓋年之上則為民斂而藏之於年之下則為民出而賑之倉人所謂有餘則藏之則斂之之謂所謂以待凶年而頒之則出之之謂常平義倉之法豈不見於此哉

掌均萬民之食而調其急而平其興

鄭康成曰均謂度其多少調廩其艱阨

○李嘉會曰司稼尤近民

故調急平興以先之又不足廩人始有移民就穀之事

愚案平其興亦當如旅師謂平均其所興舉之粟

以給之

黃氏曰司稼巡稼知歲之豐凶民之寬急為最切故通掌其事

春人奄二人女春枕二人奚五人

賈氏曰春人有奄者以與女奴同處故也○鄭康成曰女春枕女奴能春與枕者枕杼臼也詩曰或春或枕○黃氏曰春人饒人稟人皆宮中之事以用穀故屬地官春枕炊爨因祭祀賓客使內人皆識其勞苦

煩辱不止稼穡之艱難

掌共米物

鄭康成曰米物言非一米

祭祀共其盥盛之米

賈氏曰器實曰盥則黍稷稻粱是也在器曰盛則簋

簋是也

○王昭禹曰稷謂之染實於簋簋謂之盛祭用衆穀而總曰染者舉染以該衆也

○

鄭鍔曰祭祀共盥盛之米共之饔人

陳氏曰楚語云天子親春郊禘之盛又曰天子郊禘

之事王后必舂其粢穀梁曰三宮米而藏之御廩蓋祭祀貴於出力以致養而後可以交於神明則舂盛固所以自盡也然王耕籍不過三推則舂盛之禮蓋亦如此然後舂人卒其事以共之

賓客共其牢禮之米

賈氏曰下別言饗食則此言牢禮謂饗餼之米鄭氏謂實筐筥知非車米者以其公車米四十等非舂人所共故也然則車米出於稅禹貢五百里米是也

王昭禹曰賓客共其牢禮之米則以共饔人簠簋之
實牢禮之米多矣必共其饔人簠簋之實者○鄭鍔曰賓客共之於掌客則以賓客車米莒米自舍人所共故
也

凡饗食共其食米

鄭康成曰饗有食米則饗禮兼燕與食

掌凡米事

饔人奄二人女饔八人奚四十人

故書作饌○鄭司農曰饔人主炊官特牲饋食禮曰主婦視饔饗

賈氏曰祭祀共盛共王后六食不在天官者以其因春人又因地道之成故在此

掌凡祭祀共盛

鄭康成曰炊而共之

共王及后之六食

鄭康成曰六食六穀之饌

○李嘉會曰食不及世子蓋世子養於王宮女饌所

當共若出就外傳
女鰥不得而共

凡賓客共其簋簋之實

鄭康成曰謂致飧饗

饗食亦如之

王氏曰春人春穀以為米饔人炊米以為食其職事
相成故春人祭祀共盥盛之米饔人祭祀共盛春人
賓客共牢禮之米而饔人共其簋簋之實饔人共王
及后之六食饗飧亦共簋簋之實而春人不言其米

則以言祭祀賓客從可知也

橐人奄八人女橐每奄二人奚五人

鄭司農曰橐讀為犒師之犒主冗食者故謂之犒○

賈氏曰與廩人連類在此

○李嘉會曰以用奄八人蓋分俵諸處不可不多其

貲

陳君舉曰自膳夫至腊人不過充君之庖者悉領於冢宰至於共外內朝冗食者反不領於冢宰顧見於地官之橐人夫飲食男女人之大欲存焉於共奉天

子飲食而必掌之外朝之士大夫者蓋恐內官奄人求巧於飲食之中而彌縫其意以導諛納諂故使外朝之士大夫掌之而太宰實領之者誠以檢防踰侈遏絕僥倖所以正人主之心術者在此也至於內外朝冗食者之食見於橐人之職而主之奄人意者猶後世之所謂賜食焉而或取之內厨者是也潁考叔為潁谷封人有獻於鄭莊公而公賜之食以此類推之所以示其隆禮愛賢之義而橐人共冗食者之食

其猶漢世之所謂主熟食者乎至若内外朝之俸祿廩給則所以掌之者固有其人非盡出於一奄人之手也

掌其外内朝冗食者之食

易氏曰外朝庫門外之朝内朝路門外之朝○鄭鍔曰天子有三朝此特言内朝外朝而不及路寢之朝非冗吏治文書之所也

賈氏曰冗散也外内朝上直諸吏謂之冗吏亦曰散

吏以上直不歸家食彙人共之因名冗食者

若饗耆老孤子士庶子共其食

鄭康成曰士庶子卿大夫士之子弟宿衛王宮者

掌黍祭祀之犬

鄭康成曰黍犬豕曰黍不於饍人言者其共至尊雖

其潘瀾羹餘不可褻也

○李嘉會曰食之餘者惟利乎犬因以黍焉先王不使一

物之
無用

鄭鍔曰祭祀之牛牲繫於監門而犬則黍於彙人各

有以處之職雖卑者所繫亦不輕矣

總論司徒官屬

陳君舉曰周禮六官大宗伯治禮司寇治刑司馬治兵司空治事而天官治典最難攷然其職無非切於王后焉夫綱紀出治之所猶可說也至於地官掌教則又難曉焉以屬官考之自鄉老至比長自遂人至鄰長皆鄉遂之官自封人至畜人皆壘場畜牧之官自載師至均人皆掌財賦征役之官自司市至泉府

皆掌市井自司門至掌節皆掌門闕自旅師草人稻人虞衡以至掌染草炭荼蜃極於場人圉人無非山林川澤田疇之官幾於六十官所謂教官者師氏保氏司諫調人司救鼓人不過六七而已其他則整頓田疇分擘郊里征斂財賦掌管山澤紀綱市井管鑰門闕而已當時謂之教典何也說者謂司徒典教止五六人而已其如鄉遂關市山澤之官蓋分托焉而非專於教事是以教官為後世治文墨語言誦授者

設也殊不知先王教民自經界始八八為井五五為軍市有奠居里有聯比無非習民於正而寓之以道德之意俾之分定而慮不易事同而心臧生厚而德優易直而淳龐以服從上令是曰教典師保諫救調媒之官則其導嚆惡訓禮刑判合昏冠者也而豈徒謂是哉豳詩述風化之所由孟子言王道之本無非田圃之事誠知本者後世政教殊軌疆理之問不登於廟堂徃徃大臣能設學置博士弟子貢則曰是有

志於教化者何以納民於善也○呂氏曰司徒之職
皆是均土受民不見所謂掌教者蓋生養便是教既
富能教資富能訓使他衣食足各保其生方教以君
臣父子夫婦長幼之義穀粟如水火而後民興於仁
制其田里使養其老聖賢之論富民未有不及於教
所謂富而教之者也或曰唐虞三代學校與後世大
段不同只學官一事可見在舜時命夔典樂教胄子
在周時大司樂掌成均之法以治建國之學政而合

國之子弟焉何故皆是掌樂之官掌教欲得優游涵
養鼓舞動盪深入其心這一个所在不是官司自秦
漢以後把做官司看了故與唐虞三代題目自別雖
足以善人之形而不足以善人之心雖是法度具舉
然不過以法制相臨都無深入人心道理大抵教與
政自是兩事後世錯把教做政看學者但當看三代
所以設教命官教養之意且如周禮一書設官設教
所以便民若師氏保氏大司樂大胥小胥之類所教

不過是國子然當時所謂鄉遂所謂興賢能在周三
百六十官之內並存不見有設教之官雖是州序黨
庠略見於周禮然未嘗見其州序是何人掌之其法
又何如只看此亦是學者所當深思且如周禮設官
下至於射夭鳥至微至纖之事尚皆具載豈於興賢
能國之大教反不見其明文蓋凡領六官者皆是法
之所寓只緣學校不是官司非簿書期會之事故不
領於六官其上者三公論道不載於書其下者學校

設官不領於六官蓋此二者皆事大體重非官司所
領惟國子是世祿之家鮮克由禮以蕩陵德不可不
設官以教養之至其所以教養之意均非簿書期會
之可領學者當識先王之意可也蓋先王設教雖非
六官所掌而所以設教未嘗有理無事有體無用本
末亦自備見但只不在官聯官屬之中舜之時自國
子之外略不見其掌教之官然庶頑讒說若不在時
侯以明之撻以記之書用識哉欲並生哉工以納言

時而颺之如此之備在周人學官雖不領於一屬然
而比年入學中年考校一年視離經辨志三年視敬
業樂羣五年視博習親師七年視論學取友謂之小
成九年知類通達強立而不反謂之大成終始備具
至不率教者屏之遠方終身不齒又見體用本末無
窮處三代以上所以設教命官至理精義要當深攷
愚案司徒所掌大抵田賦等事似與大宰九貢九
賦太府以下等官相類細考之則大宰官屬所掌

皆國之財賦而司徒所掌皆教之田野之事所以
謂之教官後世謂六部如六官故謂戶部如司徒
抑不知今戶部所掌乃大宰屬官太府等事初無
與乎掌教之職矣

黃氏曰右地官卿一人中大夫五人下大夫十五人
上士四十八人中士一百三十人下士二百八十八
人王之門闕十二下士各二人則又四十八人府一
百三十人史二百十九人賈八人胥二百二人徒二

千四百五十六人又舞徒四十人奄十二人女春枕
二人女饅八人女橐十六人奚八十五人是皆著於
數者也山虞林衡川衡澤虞場人皆中下士闕府

史胥徒又司市立胥徒又司市立胥師賈師司競司
稽胥肆長皆不能計其數者也鄉老皆公即三公鄉
大夫皆卿即六卿六鄉三十州州長皆中大夫州五
黨黨正皆下大夫黨五族為七百五十族族師皆上
士族四閭為三千閭閭胥皆中士閭五比為萬五千

比比長皆下士六遂大夫亦中大夫六遂之縣視州
鄙視黨鄴視族里視閭其餘各下於六鄉之一等六
鄉之餘民居四郊其官為四郊之吏稍不為邑縣都
不為都有吏主之皆不可以數計也

呂氏曰總計地官公卿大夫士通用三十萬夫有奇
府史胥徒不在數虞衡迹人等亦不在數據畿內之
地似難容得許多官司畿內戶口難供得許多官須

考


○愚案陳及之說
見前論官職多寡

周禮訂義卷二十八

謹案卷二十七第六頁前七行又令其民籬草而
灰之刊本又訛人今改

第二十頁前五行夫材美工巧刊本材訛財今改
第二十九頁前一行川衡正於澤虞刊本澤虞訛
虞衡今改

卷二十八第十五頁後六行周之量非後世比刊本
周訛國今改



覆校官庶吉士臣茅元銘

校對官檢討臣李學錦

謄錄監生臣程蓮孫

欽定四庫全書薈要

經部

周禮訂義卷

二十九

詳校官編修臣程嘉謨




欽定四庫全書薈要卷一千九百二十五

經部

周禮訂義卷二十九

宋 王與之 撰

春官宗伯上

 氏曰春官以治教之始在於禮象天地之化始於春。○鄭鍔曰自舜命伯夷典三禮其官曰秩宗周人

因名曰宗伯說者謂宗尊也伯長也天下所宗者惟宗於禮此禮所以為尊也近世王安石云宗典祀禮者也宗伯掌天神地示人鬼之禮故謂之宗然宗伯

所主何獨祭祀之禮哉自四方言之東者歲之始自
四時言之春者時之始宗伯於四時之官獨為長故
以伯稱之春秋之際魯有夏父弗忌為宗人蓋周之
舊也

惟王建國辨方正位體國經野設官分職以為民極乃
立春官宗伯使帥其屬而掌邦禮以佐王和邦國

鄭康成曰禮謂曲禮五吉凶軍賓嘉其別三十有六

○鄭鍔曰禮猶火取之槐檀則火在槐檀取之杏棗
則火在杏棗取之柞櫨桑柘則火在柞櫨桑柘火無

所不在禮亦無所不在有君臣則禮在君臣有父子則禮在父子有夫婦則有夫婦之禮有朋友則有朋友之禮行乎道路至于州巷放乎菟狔脩乎軍旅冠昏喪祭飲食起居無非禮也掌禮之官詎可以專乎一哉如司尊彛司几筵之名司為禮官之屬所謂籩豆之事則有司存

項氏曰禮之用以和為貴民生有欲而無分則爭爭則乖先王制禮為之節文以事其鬼神示哀其憂賓以親之軍以同之祭然有文足以相接則乖爭之患

何自而作故曰和○程氏曰古者冠昏喪祭車服器用等差分別莫敢踰越故財用易給民有常心今禮制未脩奢靡相尚卿大夫之家莫能中禮商販之類或踰王公禮制不足以檢飭人情

名數不足以旌別貴賤既無定分
姦詐攘奪人人求厭其欲而後已

呂氏曰禮官之長是為宗伯壇場昭穆之等聘享射
御之節貫本末而等文質者所謂禮也神人之所以
治上下之所以和失其禮則僭亂諂妄而瀆乎神乖
爭陵犯而悖乎人上下皆失其分安得而和成周萃
禮樂於一官和云者蓋亦已樂於其間後世禮樂廢
壞治人者不過簿書期會之末至於祀典尤為不經
間有一二僅存不過曰使先王文物不廢乎吾世而

已所謂治人者漫不知其語矣

愚案六卿自冢宰以下皆以有司言獨宗伯不言
司四官皆言垂象獨宗伯不言象以見禮樂法而
不說而致中和之用足以為參贊化育之功非可
以有司比也

禮官之屬大宗伯卿一人小宗伯中大夫二人肆師下
大夫四人上士八人中士十有六人旅下士三十有二
人府六人史十有二人胥十有二人徒百有二十人

薛平仲曰禮有小有本末大者經小者紀本者義末者數經既立則紀不可以偏廢故大宗伯之貳有小宗伯焉義既明則數不可以不具故宗伯之屬有所謂肆師焉肆之為言陳也郊特牲曰其數可陳也其義難知失其義而陳其數祝史之事也知其義而敬守之天子之所以治天下也然則有宗伯以明其義又有肆師以陳其數則周之禮可不謂之大備乎大宗伯之職掌建邦之天神人鬼地示之禮以佐王建

保邦國

鄭康成曰建立也立天神地示人鬼之禮謂祀之祭

之享之禮吉禮是也

○李嘉會曰和邦國諧和其情也建保邦國則各安其分守矣

天神人鬼地示各安其分推以化民治國特餘事耳

唐氏曰虞書巡守脩五禮臯陶謨言自我五禮至命官則曰典朕三禮盖五禮兼神人三禮事神之禮也宗伯先言建邦之天神人鬼地示之禮則所謂典三禮次之以吉凶軍賓嘉則五禮也

鄭康成曰保安也。○王昭禹曰合五禮而言則曰佐王和邦國別三禮而言則曰佐王建保邦國蓋封國則頒祀此之謂建祭則受福此之謂保。○黃氏曰伯夷降典折民惟刑功配禹稷而其事始於事鬼神是則建保邦國誠有其本也。紂謂祭無益犧牲染盛既于凶盜祖伊以為商亡之決如是也。○賈氏曰上單言邦據王為言以佐王建保邦國則統侯國言之矣。

以吉禮事邦國之鬼神示

黃氏曰吉禮居其首禮主敬敬莫著乎祭。○鄭鏐曰

祭祀之交於神明有受福之道故以吉名之。○鄭康成曰吉禮之別十有二事

王氏曰謂之建則禮當自王出謂之事則非特王國而已

王氏詳說曰或言鬼神示或言神示鬼何曰此所以為秩宗之官也以上下秩之則曰神鬼示以內外秩之則曰鬼神示以尊卑秩之則曰神示鬼

孫氏曰先王明於天地之故察於人之理知所以接

三才者即吾保邦之實政不容外三才而自任其私智也故天以氣覆物吾則用禋祀實柴禋燎以祀之地以形載物吾則用血祭粢醢醢以祭之至於人鬼之奉則立之尸以人道饗焉凡此者皆實致其義實當其情求之於心驗之於事一有違於天有悖乎地有愧乎先則為不克祀不克祭不克享矣惟聖人能享帝孝子能享親此之謂也

以禋祀祀昊天上帝

愚案自此至雨師皆祀天神

張氏曰鄭注禋祀則變禋為煙取其尚臭據洛誥曰
明禋又國語曰精意以享曰禋徧觀書傳皆言禋是
精潔致祭之名凡祀天日月星辰風師雨師皆取煙
燎不言可知今祀天言禋祀日月言實柴祭天禮重
故取禋敬之名以別之鄭不明此意改禋為煙謬哉
書曰禋于文王武王又曰禋于六宗○鄭鍔曰謂之
禋祀明在乎致其心齋精明誠一為主而已

陳及之曰祀昊天上帝總言祭天耳昊天猶言蒼天也○程氏曰孝經云郊祀后稷以配天宗祀文王於明堂以配上帝天與帝一也天言其體也帝言其主也在郊則言天以其冬至物生之始故祭於圜丘而配以祖陶匏藁秣掃地而祭宗祀言上帝以季秋物成之時故祭於明堂而配以父以宗廟之禮享之王○昭禹曰昊天有上帝猶國之有君五精之君則猶四方之諸侯諸侯有君道故皆謂之君五精之君有帝之道故皆謂之帝天者帝之體帝者天之用體嫌於不能降用嫌於不能辨故言其降而與物接則以

昊言天言其升而與物辨則以上言帝○鄭鍔曰周禮有言天有言昊天上帝有言上帝有言五帝言天則百神皆預大司樂所謂天神皆降之類是也言五帝則無預乎昊天上帝司服所謂祀昊天上帝祀五帝亦如之之類是也言上帝則無預乎五帝掌次所謂旅上帝張毳案祀五帝則張大次之類是也言天言帝神各不同至於昊天上帝則兼舉其統天言之以其氣之浩浩故曰昊天以主位乎上故曰上帝位為最尊物無以稱其德惟致其精意可以享之故以裡祀祀昊天上帝國語所謂精意以享謂之裡是也○愚案天之與帝其實則一如伊川之說無疑如五帝之諡鄭氏亦失之詳見小宗伯

以實柴祀日月星辰

項氏曰日司晝月司夜星辰司次十有二辰二十有

八星○鄭司農曰實柴實牛柴上也○鄭鍔曰日月星辰民所瞻仰而在祀典者必以氣臭而達之故用

實柴實牲燔柴則氣臭上達矣

○陸氏曰古者之祀日月其禮有六郊特

牲郊之大報天而主日配以月一也玉藻曰朝日于東門之外祭義曰祭日于東祭月于西二也小宗伯四類兆日于東郊兆月于西郊三也大司樂樂六變而致天神及象物月令孟冬祈來年于天宗天宗者日月之類四也覲禮拜日于東門之外禮日于南門之外拜月于西門之外禮月于北門之外五也左傳雪霜風雨之不時于是乎禋之六也夫因郊報而祀之非正祀也類禋而祀之與覲禮諸侯而禮之非常祀也春分朝日于東門之外秋分夕月于西門之外此祀之正與常也日言朝則于日出之朝朝之月言夕

則于月入之夕夕之日壇謂之王宮以其
君道也月壇謂之夜明以其明于夜也

以禋燎祀司中司命音風師雨師

鄭康成曰禋積也三祀皆積柴實牲體焉或有玉帛
燔燎而升煙所以報陽也○王氏曰柴而實牲然後
禋燎天祀之所同也或言實柴或云禋燎相備而已
賈氏曰先鄭以司中是三台司命是文昌今三台與
文昌皆有司中司命故後鄭不從武陵太守星傳云
文昌宮六星一上將二次將三貴相四司命五司中

六司祿又云三台一名天柱上台司命為太尉中台

司中為司徒下台司祿為司空

○鄭鍔曰祭法王立七祀曰司命曰中雷

曰國門曰國行曰泰厲曰戶曰竈此所謂司命者乃七祀之司命所謂司中者其七祀之泰厲乎蓋人受命以生萬物之命繫于司命人受中以生萬物之性繫于司中論者謂人之性正則中過則厲司中以正言之泰厲以反言之其實一也七祀之神其五者託體乎地故以血祭祭之此二者託體乎天故以禴燎祀之各從其類也

春秋緯云月離乎箕風必揚沙是風師箕

也詩云月離于畢俾滂沱矣是雨師畢也

○崔氏曰祭司中司

命風師雨師之法皆謂隨其類祭之所以然者謂星辰運行無方故兆日于東郊兆月于西郊象日月之

生兆風師于西方不從箕星者箕星天位爾兆司命于南郊既無風雲取放故直以天神是陽兆于南郊兆雨師于北郊者水位在北也風師箕雨師畢司中司命文昌第四第五星或曰中能上能其牲則少牢故鄭注祭法云牲以少牢其祭之法先以牲體置于薪上而燔之以升煙于天以降神然後以玉禮神于坐玉則用璋邸射以祀之用半圭之璋取殺于四望

以血祭祭社稷五祀五嶽

愚案自此至百物祭地示也

鄭康成曰陰祀自血起○項氏曰血毛告幽全之物又曰血祭盛氣也則以地道有幽陰之義而求之以

血也

○鄭錡曰血之為物有象而非虛有形而非實物之幽蓋亦求之于虛實之間

陸氏曰社祭五土之示稷祭五穀之神祭社必及稷

以其全功均利以養人也祭必有配社配以勾龍

共工

氏子稷配以柱

烈山氏子

商之時又易柱以棄其功利足以

侔社稷故也

鄭節卿曰五祀見於周禮禮記雜出於史傳多矣左

傳家語則以五祀為重該熙黎勾龍之五官

○陳止齋曰案

春秋傳魏獻子問于蔡墨以為社稷五祀誰氏之五官對曰少皞氏四叔重為勾芒該為蓐叔修及熙為

元冥此其三祀也顓頊氏子黎為祝融共工氏子句龍為后土此二祀也后土為社稷為田正然則社稷為一句月令以五祀為門行戶竈中雷白虎通范曄

高堂隆以五祀為門井戶竈中雷鄭氏釋大宗伯之

五祀則用左氏家語之說釋小子之五祀則用月令

之說釋王制五祀則用祭法之說門戶人所資以出

入中雷人所資以居竈井人所資以飲食○鄭鍔曰中雷土也

季夏祀之井水也冬祀之門金也秋祀之戶木也春祀之竈火也夏祀之皆五行之小神在地者故其祭亦自血始或謂天子七祀此祭其五○王氏詳說曰何也余以為司中泰厲以極祀之矣

此即王制之說雖本於月令然乃宮中之小祀豈可與社稷五嶽同科左氏傳載魏獻子問於蔡墨以為社稷五祀誰氏之五官其說甚明

鄭康成曰五嶽東岱宗南衡山西華山北恒山中嵩高山不見四瀆者或省文○黃氏曰鄭謂四瀆五嶽之匹非四瀆川祭四望則四瀆在焉○鄭鶚曰五山為國重鎮者國所賴以鎮則神皆託於土故此三者同於血祭

○黃氏曰春秋傳曰觸石而出膚寸而合不崇朝而雨徧天下者惟泰山乎其功用

大故與社稷
同其秩祭

以狸沈祭山林川澤

鄭鍔曰山林有功於狸藏川澤有功於涵容祭山林之牲則埋之祭川澤之牲則沈之各象其德○張南軒曰古者祭山川以其能雲雨澤潤萬物為之壇壝立之祝史設之牲幣所以致吾禱祠之實而交孚乎隱顯之際誠之不可掩如此後世亦有山川之祠而人其形封其地則失之矣○崔氏曰祭之法各當其

時山林于壇川澤于坎故

禮記云四坎壇祭四方牲用少牢王服玄冕牲
玉各放其方之色樂則奏蕤賓歌函鐘舞大夏

以醠辜祭四方百物

王昭禹曰醠者肆而磔之辜者制而磔之四方異體
肆而不全故祭以醠百物異用制而不變故祭以辜

亦各以其物宜

○崔氏曰蜡祭之法昔者伊耆氏始為蜡蜡索也周則十有二月合聚萬

物而索享之祭先嗇一神農是也司嗇二后稷是也
農三謂田畯郵表畷四表畷者田畯督約百姓于井
間之處猫虎五坊六水庸七昆虫八凡祭之禮以先
嗇為主司嗇為佐猫為食田鼠虎為食田豕坊庸為
止水等皆為田事其祭之法視四方豐耗而祭之不
成之方缺而不祭故記云年不順成八蜡不通既蜡

之後黃衣而臘先祖五祀于是勞農而休息之

總論

胡仁仲曰成身莫大於禮禮莫重於祭王者繼天為子故祭天於郊祭地於社祭名山大川五祀各於其方後世儒者論祭天地之禮於天則有昊天上帝有五方帝有感生帝夫土不可以有二王而天可以有七帝乎於地則或立方澤或立方丘園丘為母齊衰期不敢亢其父者尊無二上故也王者父事天母事

地而可崇地以抗乎是故兆於南郊埽地而祭者昊天上帝而已天言其氣帝言其性社祭土所以神地道名山大川者寶貨財用之所出四方之所據依也五祀者土與水火金木人所日用不是之報將誰報焉行與門戶舉輕失重豈禮也哉禮之所貴貴其義是故王者祭天以柴燎牲使氣上達語其精神則謂之禋語其感極則謂之類語其方兆則謂之郊指事異名其實一也

以肆獻裸享先王以饋食享先王以祠春享先王以禴夏享先王以嘗秋享先王以烝冬享先王

鄭鍔曰廟祭之序始者王以玉瓚酌鬱鬯獻尸是為裸獻既裸於是迎牲而殺乃行朝踐之事朝踐禮畢乃行饋獻之事則薦以今世之食以其序推之則肆饋獻也獻朝踐也裸始裸也謂之肆者詩曰或剝或亨或肆或將剝者解牲體肆者解而陳之俎也始而裸以求之中而薦腥則以神事焉終而薦熟則以人

養焉此經乃以肆獻裸為序何耶余攷鄭康成之說云於祫逆言之者與下共文明六享俱然祫言肆獻裸禘言饋食著有黍稷互相備王安石以謂羞其肆而酌獻焉則以裸享先王其裸也猶事生之有享羞其熟而饋食焉則以食享先王其食也猶事生之有食也然祫以合食為主未嘗無食禘以審禘昭穆為主未嘗不裸裸主於敬食主於愛二者亦互見祠春禴夏嘗秋烝冬之享時祭之名也禮不豐不殺所以

稱時有以少為貴者有以多為貴者春夏以蒐苗而奉祭祀時物方生可獻者寡故春以詞為主夏以樂為主而已尚詞者為物不足以言詞道意也尚樂者陽氣浸盛樂由陽來也此所謂以少為貴也秋冬以獮狩而奉祭祀百物既登可獻者衆故秋以薦新為主冬以備物為主焉嘗者物初成始可嘗於是而薦新也烝者物畢皆可烝於是而備物也此以多為貴者也

○王昭禹曰至于烝則衆物盡矣其備小物水草之類陸產之醢在焉其備美物也三牲之俎

八簋之實在焉其備陽物昆虫之異在焉其備陰物也草木之實在焉天之所生地之所產苟可以薦者莫不咸在此其所以為盛歟

陳君舉曰祠禴嘗烝此四時孟月王親祭于祖廟之禮肆獻裸饋食四時孟月吉皆用此二禮注謂為六介祭名不是○陳及之曰爾雅曰禘大祭也蓋天子四時之祭曰祠禴嘗烝而三年大祭曰禘其祖之所自出為東鄉之尊其餘皆合食於前皆為禘也喪服小記大傳所謂王者禘其祖之所自出以其祖配之

祭法謂有虞氏禘黃帝而郊嚳夏后氏禘黃帝而郊鯀殷人禘嚳而郊后稷皆謂三年大祭祭其祖之所自出諸侯亦四時有祭而三年之祭曰祫合食於祖廟而食大夫亦有時而祭而三年之祭曰殷春秋傳謂殷以少牢鄭氏所引魯禮則非魯不當有禘孔子謂魯之郊禘非禮也周公其衰矣又曰禘自既灌而往者吾不欲觀之矣蓋成王之賜伯禽之受皆非也孔子於春秋欲貶而不勝書故因事而貶若吉禘

莊公禘于太廟用致夫人是已此大宗伯所謂肆獻裸及饋食者謂祭之禮有此四等也而必兩言之者明宗廟有裸鬯禮既灌而獻有薦腥禮既薦而肆有薦熟禮既肆而饋有饋食禮自禘及四時祭皆然

總論

王氏詳說曰天神之祀以煙為歆神之始地祇之祭以血為歆神之始人鬼之享以裸為歆神之始其實天神同於煙地亦同於血人鬼同於裸且詩曰芃芃

棧樸薪之槩之書曰柴望大告武成記曰燔柴於泰壇祭天也今以日月星辰為實柴司中司命風師雨師為槩燎然則祀昊天上帝非柴非燎何以為煙乎是禋祀云者取其歆神之始耳記曰郊血大亨腥三獻燔一獻熟夫郊天也大亨祫也三獻社稷也一獻羣小祀也用血者未始不熟用熟者未始無血此所以謂腥其俎熟其醑也今以社稷五祀五嶽為血祭則狸沈醢辜何以為非血乎是血祭云者取其歆神

之始耳司尊彝曰春祠夏禴裸用雞彝鳥彝秋嘗冬烝裸用斚彝黃彝今以肆獻言裸而饋食與四時之享何以為不用裸乎是肆獻裸者取其歆神之始耳以凶禮哀邦國之憂

鄭康成曰哀謂救患分哉凶禮之別有五○鄭鍔曰天子之於諸侯位雖君臣情則父子未有子疾病痛苦父不為之憂者故邦國有憂則有凶禮以哀之愚案盛衰消長天之道也聖人不患其凶患無其

備故以是禮繼於吉禮之後

以喪禮哀死亡

鄭康成曰哀謂親者服馬疏者含祔○鄭鍔曰隱公之時天王使宰咺來歸惠公仲子之賵文公之時王使榮叔歸含且賵是也

以荒禮哀凶札

鄭康成曰荒人物有害也曲禮曰歲凶年穀不登君膳不祭肺馬不食穀馳道不除祭事不縣大夫不食

祿士飲酒不樂札讀為截謂疫癘

以弔禮哀禍哉

鄭康成曰禍哉謂遭水火宋大水魯莊公使人弔焉
廐焚孔子拜鄉人為火來者拜之士一大夫再亦相

弔之道

○易氏曰神所崇謂之禍天所毀謂之哉

以禴禮哀圍敗

易氏曰國之見圍謂之圍師之敗績謂之敗以禴禮
哀之於是合財以補其乏若澶淵之會諸侯謀歸宋

財是也

○賈氏曰大行人云致禴以補諸侯之災小行人云若國師役則犒禴之

以恤禮哀寇亂

鄭康成曰恤憂也鄰國相憂兵作於外為寇作於內為亂○鄭鍔曰左傳言救邢之事曰簡書同恤禮有相救之道隱公亦云君命寡人同恤社稷之難則恤禮者問之勞之見天子憂恤之意

○王昭禹曰恤以救之若衛有狄人

之難而齊威救之

王氏曰喪禮凶禮以彼喪荒哀之也吊禮禴禮以我

弔禮恤哀之也

以賓禮親邦國

鄭康成曰親謂使之相親附賓禮之別有八○黃氏
曰賓禮皆王之所以禮答諸侯朝覲宗遇會同諸侯
脩王事王皆以禮見之也

鄭鍔曰天子之於諸侯以分言之則君臣以情言之
則賓主故先王不待以純臣之義而以賓禮親之我
有以親之彼安得不吾親哉

○易氏曰臣道以尊天子為主賓道以親諸侯

為主

春見曰朝夏見曰宗秋見曰覲冬見曰遇

鄭康成曰朝猶朝也欲其來之早

○易氏曰朝如日出於寅之朝而朝

于天宗尊也欲其尊王

○易氏曰宗如萬物相見于南方而其類皆有所宗覲之

言勤也欲其勤王之事

○易氏曰覲謂物成之時各覲其實以報乎上遇偶

也欲其若不期偶至

○易氏曰謂閉藏之時其相見若邂逅之遇○胡康侯曰古者

有遇禮不期而會以明造次亦有共肅之心春秋書遇私為之約自比于不期而會者直欲簡其禮耳故凡書遇者皆惡其無人君相見之禮也

鄭鍔曰朝宗則在朝時則用春夏其位則諸公東面諸侯西面說者以為萬物交際之時以象生氣之文人君則於堂下而見之所以通上下之情覲遇則在廟時則用秋冬其位則諸侯一於北面說者以為萬物分辨之時以象殺氣之質也人君則於堂上而見之所以正君臣之分記曰覲禮不下堂而見諸侯下堂而見諸侯天子之失禮也由夷王以下蓋朝廷出迎賓則下堂覲禮不迎賓則不下堂也朝則天子當

宁而立宁者門屏之間以象陽之出布散於外觀則
天子當宸而立宸者戶牖之間以象陰之入收藏於
內此又朝覲之別也

○李嘉會曰當宁若今臨軒將以圖事諏政當宸退立於宸以

受諸侯之獻功

陳及之曰太宗伯曰春見曰朝至冬見曰遇大行人
曰春朝諸侯而圖天下之事秋覲以比邦國之功夏
宗而陳天下之謨冬遇以協諸侯之慮時會以發四
方之禁殷同以施天下之政又曰侯服歲一見甸服

二歲一見男服三歲一見采服四歲一見衛服五歲
一見要服六歲一見司馬曰春以禮朝諸侯圖同事
夏以禮宗諸侯陳同謨秋以禮覲諸侯比同功冬以
禮遇諸侯協同慮時以禮會諸侯發同禁殷以禮同
諸侯施同政鄭康成以六服之內以時分來或朝春
或宗夏或覲秋或遇冬賈公彥從而廣之曰春則東
方盡來夏則南方盡來秋則西方盡來冬則北方盡
來以余論之皆未允以為春則東方諸侯盡來耶則

比功之禮未嘗施之矣以為夏則南方諸侯盡來耶
則協慮之禮未嘗施之矣若圖事專以待東方諸侯
比功專以待西方諸侯陳謨專以待南方協慮專以待
北則王政豈無偏黨之患哉案周官云六年五服一
朝又六年王乃時巡考制度于四嶽諸侯各朝于方
嶽又案王制諸侯於天子比年一小聘三年一大聘
五年一朝然則四方諸侯六年惟一朝耳若然以春
來則曰朝以夏來則曰宗以秋來則曰覲以冬來則

曰遇耳猶漢律春曰朝秋曰請吳王濞春不朝使人
為秋請是也又尚書康王初即位太保率西方諸侯
入應門左畢公率東方諸侯入應門右則是康王初
即位四方諸侯以朝適皆在京師又安有春則東方
來夏則南方來秋則西方來冬則北方來耶其所謂
圖天下之事等語作禮者之詞而司馬又承之也而
其有可疑者大行人謂六服諸侯朝有踈數之節六
年而畢近世蘇東坡說書亦以一朝為畢朝未約其

實也當從識者論之

愚案古人封建諸侯有人民有社稷焉若以春則東方諸侯皆來夏則南方諸侯皆來卒不幸有乘間而起如昆夷獫狁之難孰從而折衝禦侮之空其一方同時畢集斷無此理苟縱其自便不朝京師萬一有專擅難制之事如唐之藩鎮又何以為制馭諸侯之權要知王者欲親諸侯必設為可親之禮或不能朝於春則可以宗於夏或不能覲

於秋則可以遇於冬但六年之內不可不一次來
王不然巢本南方國巢伯來朝何以曰朝不曰宗
韓本北國韓侯入覲何以曰覲不曰遇要知古人
立為朝覲宗遇之禮於春夏秋冬之間以見四時
皆來王之日而禮非有所輕重於其間

時見曰會殷見曰同

鄭康成曰時見者言無常期諸侯有不順服者王將
有征討之事則既朝覲王為壇於國外合諸侯而命

事焉春秋傳曰有事而會是也○鄭鍔曰以有事而會則時見者國有事之時而來見其會之有時故謂之會

鄭康成曰殷猶衆也十二歲王如不巡狩則六服盡

朝朝禮既畢王亦為壇合諸侯以命政焉如王巡守

殷見四方四方分來終歲則徧

○鄭鍔曰易有殷薦禮有殷奠則殷為盛

多之義殷見者合衆多之國而來見其來必同故謂之同也○黃氏曰殷有三義衆也正也盛也殷見殷類義皆當為正協時月正日同律度量衡考禮修德正刑故謂之殷同

王氏詳說曰時會則事出非常故無常時殷同則有常時亦如常朝之歲但會同之禮因朝覲之時行之故又曰大朝覲

時聘曰問殷覲曰視

王昭禹曰時聘殷覲王人之所以賓於諸侯時聘施

於時見之後以恩問之故時聘曰問

○黃氏曰時聘存覲省也各以

其時行之猶時會時巡五歲而編

殷覲施於殷見之後以事有所察

治故殷覲曰視

鄭鍔曰聘以財為禮其名曰問有問遺之意覲以見為禮其名曰覲有省視之意攷行人言時聘以結諸侯之好殷覲以除邦國之慝此乃王見諸侯之文槩以為諸侯聘覲乎天子則與行人之文不合槩以為王者之禮則又與大宗伯諸侯見王之文不合合二官攷之蓋聘類之禮王與諸侯交用之何以言之時聘曰問殷覲曰視繼於春見曰朝夏見曰宗之下則曰問曰視者為諸侯問視乎王之禮也若以行人結

好除慝之文例之則又是王者聘以結諸侯之好覲
以除邦國之慝也人徒見古者比年小聘三年大聘
小聘使大夫大聘使卿皆臣聘乎君遂謂君無聘乎
臣之理殊不知小行人有曰王之所以撫邦國諸侯
者歲徧存三歲徧覲五歲徧省則王有覲禮於諸侯
明矣其所以異者諸侯行之則曰問視天子行之則
曰除慝結好天子之覲見於小行人三歲之制若夫
聘禮則無傳春秋之時王臣來聘于魯者八亦可以

為證

周禮訂義卷二十九